

Høyringsuttale til: Osterøy 2030. PLANPROGRAM FOR KOMMUNEPLANEN SIN SAMFUNNSDEL HØYRINGSUTGÅVE

Miljøpartiet dei grøne Osterøy (MDG) ønskjer med dette å kome med nokre innspel til planprogrammet for kommuneplanen.

MDG meiner at innhaldet i planprogrammet jamnt over er godt. Samstundes har me nokre innspel når det gjeld utdjuping av enkelte tema, og forslag til nokon vurderingssspørsmål som førebels ikkje er tatt med.

Miljøpartiet Dei Grøne skil seg fra alle andre parti med at du ikkje er i tvil om kva som står øvst på dagsorden: Ei jord som komande generasjonar også kan leve på, eit omsyn som må gå framfor økonomisk vekst. Lokalt gjeld dette til dømes korleis ein byggjer ut og korleis ein tek vare på strukturen som allereie er på Osterøy, samt berekraftig forvaltning av naturressursane. Me vil no gjennomgå dei aktuelle temaområda der me meiner det er rom for forbedring:

Eit godt og helsefremjande samfunn

Her står det at "det er viktig at folkehelsearbeid ikkje berre dreier seg som førebygging av sjukdom og skader, men at ein også ser på god folkehelse som evna til å takle endringar og motgang". MDG meiner at førebyggjande folkehelsearbeid vil kunne bidra til nettopp til å gjere folk meir robuste. Førebyggjande strategiar både på systemnivå og meir lokalsamfunnsbaserte tilnærmingar vil kunne ha stor innverknad på folkehelsa. Under dette temaet bør ein difor og ha med: **Korleis kan me best førebyggje helsevanskar på Osterøy?**

Fritid og fellesskap

Her saknar me ei tematisering av allemannsretten, og korleis ein best kan verne om kvar og ein sin rett til å ferdast fritt i naturen. **Korleis kan me verne om allemannsretten til å ferdast i naturen?**

Arealstrategi; bustad, infrastruktur, natur, næring og servicetilbod:

Planprogrammet har tatt med ei betraktning om berekraftig arealbruk, korleis arealbruk skal fremje god folkehelse og kva som er gode infrastrukturløysingar. Me saknar eit punkt som også tydeleggjer utfordringa med arealbruk og vern av matjorda. Ein kan argumentere for at dette går innunder omgrepet berekraftig. Vårt forslag er likevel at dette vert spesifisert i eit eige punkt: **Korleis kan ein sikre at areal vert nytta på ein måte som vernar om lokalmiljøet og matjorda?**

Under spørsmålet "korleis vil me sikre at arealbruken er med på å fremje god folkehelse", har me forslag til ei meir konkret formulering: **Korleis kan kommunen få til ei planlagt og skånsam utbygging som tar omsyn til fellesskapet og framtidige generasjonar, og som sikrar god folkehelse?**

MDG Osterøy saknar ei meir direkte tematisering av kollektivtransport, som må utbetrast med tanke på framtida. Ein stor andel av innbyggjarane har arbeidsplassen sin utanfor kommunen. Sjølv om ein vil arbeide for nye arbeidsplassar i kommunen,

er det likevel anslått at andelen med pendlarar til fastlandet vil vere høg også i framtida. Eit utbetra kollektivtilbod då avgjerande dersom dette skal bli eit fullgodt reisealternativ til privatbilen. Det kollektive tilbodet på Osterøy må stå i samsvar med korleis innbyggjarane reiser i det daglege, både i arbeid og fritid. Spørsmålet bør vere: **Korleis kan ein utbetre tilbodet for kollektivtransport i kommunen, i tråd med innbyggjarane sine reisevaner?**

Medan arealstrategiane fokuserer på senterstruktur, vekstområde og utvikling av næringsområde, bør samfunnsdelen tematisere arealbruk som fremjar god folkehelse. Samfunnsforskning viser at det er god folkehelsepolitikk å utarbeide parkområder og grønne lunger der folk er samla. På Osterøy er kommunesenteret og områdesentra i stor grad bygd rundt parkeringsplassar. Dette er dårleg folkehelsepolitikk. Vidare utvikling av tettstader og utbygging må gjerast for folk, ikkje for trafikk. Planprogrammet bør difor ha med dette vurderingsspeørsmålet: **Korleis kan me arbeide for at det vert utvikla bilfrie og trygge samlingsplassar i områdesentra?**

Offentleg tenestetilbod skal i all hovudsak leggst til kommunesenter og områdesentra (jf. arealstrategiane). Servicetilbodet på si side, bør i større grad plasserast der folk allereie bur/ferdast. Dette for å redusere bilkjøringa og stimulere til meir bruk av sykkel/føter. Små butikkar med detaljhandel i områdesentra meiner me vil kunne bidra til dette. Ein bør difor ha med ei vurdering om: **Korleis kan servicetilbodet på Osterøy strukturast på ein måte som er mest tenleg for innbyggjarane?**

Osterøy står ovanfor ei utfordring, når fleire bygder har fått lagt ned skulen, og når utbygginga peikar i retning av stadig meir sentralisering. MDG Osterøy meiner at eit heilt sentralt fokus må vere å jobbe for levande bygder i framtida. Følgjande vurdering bør kome med i planprogrammet: **Korleis kan ein skape og oppretthalde levande bygder?**

Arbeid og næringsliv:

Her saknar me ei problematisering av at fleire bedrifter på Osterøy i dag er leverandørar for oljeproduksjon, ei næring som vil møte på store utfordringar i framtida etter som det vil skje ei omstilling frå fossil til fornybar energiproduksjon. **Korleis skal me sikre ei robust industrinæring som kan handtere og omstille seg til ei framtid med andre føresetnader?**

Under problemstillinga "korleis kan ein legge til rette for framtidsretta nyskaping i primærnæringane?" har me eit forslag til ei omformulering: **"korleis kan ein legge til rette for framtidsretta og berekraftig nyskaping i primærnæringane?"**

Natur og miljø:

Her saknar MDG eit punkt om haldningsarbeid, for å endre folk sine haldningar til miljøvern i ei meir berekraftig retning. Mange stader på Osterøy kan ein sjå gamle maskiner/bilar/utstyr ligge å slenge i naturen. **Korleis kan kommunen fremje gode haldningar, for å sikre ein rein natur fri for forøpling?**

Vidare har me og forslag til ei ny formulering:

Korleis kan kommunen fungere som føregangsmodell og pådrivar for å påvirke befolkninga og lokalt næringsliv i forbruk og åtferd?

Osterøy er omgitt av sjø, der oppdrettsanlegg for fisk fører til store utslepp og utfordringar med å bevare villaksstammene. Me sakar eit punkt som tar med ei vurdering av dette. ***Korleis kan me sikre ei berekraftig forvalting av havressursane og sunne fjordar?***

Og sist men ikkje minst så saknar me eit punkt om vern av raudelista artar og berekraftige viltbestander. ***Korleis kan me ta vare på artsmangfaldet på Osterøy?***

Med venleg helsing

Miljøpartiet dei grøne Osterøy

Jon Flydal Blichfeldt
1. kandidat

Silje Midtbø Vevle
2. kandidat